


Öise Lade 10-2014, p. 70

In salid *rumantsch*

Las vacanzas, il pli bel temp da l'onn! Era jau sun da quel avis e ma legrel adina danovamain da planisar in viadi: tschertgar bels albierts cun vistas unicas, bunas ustarias che servan spezialitads indigenas, rivas solitarias, nua ch'ins po far lungas spassegiadas e tschertgar conchiglias, crappa ed auters stgazis da la mar.




In souvenir
per tut l'onn

Tuttenina è el qua, il di da la partenza e lura va tut fitg svelt – il sgol, ils dis a l'ester, millis d'impressiuns, novas fatschas, gusts savurus e sitgs squisits. Ils dis passan en in hui e gia èn ins puspè a chasa. Bain èn las bursas vidas, ma persunter èn ins puspè plain novas ideas ed energia positiva. Ma er insatge auter na dastga mai mancar en mia valisch, cura che jau return d'in viadi: in sal dal pajais che jau hai gist visità.

Da las vacanzas en Scozia hai jau per exempel prendì a chasa in sal fimentà che jau dovrel fitg gugent per cundir charn. Da mes viadi a Mallorca hai jau prendì cun mai gist dus differents sals: fleur de sel cun lavandra e citrona e fleur de sel cun oranscha e chili. E vi da mes dis en l'Irlanda ma regordan ils flocs da sal marin che sumeglian pitschnas piramidas. Adina cura che jau dovrel in da quels sals, ma vegnan endament ils bels muments a l'ester, il sulegl sin mia pel u il vent en mes chavels. Ed jau hai bunamain l'impressiun da puspè esser là ...

Stai bainin e n'emblidai betg da prender a chasa in sal da l'ester!



Angela Schmed Bass